

M140D: Mariensequenz aus Muri (D)

- 0,1 ave vile liehtiu mare stella
0,2 ein lieht der kristenheit Maria
0,3 aller megede lucerna .
0,4 vröuwe dich gotes cella
0,5 beslozzeniu porta
0,6 wande dû den gebære
0,7 der dich unde alle die werlt geschuof
0,8 nû sihe wie rein ein vaz dû maget dô wære .
0,9 sende mînen sinnen
0,10 des himeles küniginne
0,11 wære rede süeze
0,12 daz ich den vater unde den sun
0,13 unde den vile hêren geist loben müeze .
0,14 iemer maget âne ende
0,15 muoter âne missewende
0,16 vrouwe dû hâst versüenet daz Eva zerstôrte
0,17 diu got überhôrte .
0,18 hilfê mir vrouwe hêre
0,19 troeste uns arme durch di êre
0,20 daz dîn got vore allen wîben ze muoter gedâhte .
0,21 als dir Gabriêl brâhte .
0,22 dô dû in vernæme
0,23 wie dû von êrste erkoeme
0,24 dîn vile reiniu schame
0,25 erschrac von dem mære
0,26 wie maget âne man
0,27 iemer kint gebære .
0,28 vrouwe an dir ist wunder
0,29 muoter und maget dâr under
0,30 der die helle brach .
0,31 der lac in dînem lîbe
0,32 unde würde iedoch
0,33 dâr under niet ze wîbe .
0,34 dû bist aleine der sælden porte
0,35 jâ würde dû swanger von worten
0,36 dir kom ein kint
0,37 vrouwe durch dîn ôr
0,38 des juden christene unde heidene sint

0,39 unde des genâde ie was endelôs
0,40 aller meide ein gimme
0,41 daz kint dich im ze muoter erkôs .
0,42 dîn werdicheit diu ne ist niht kleine
0,43 jâ trüege dû maget reine
0,44 daz lebente brôt
0,45 daz was got selbe
0,46 der sînen munt zuo dînen brusten bôt
0,47 und dîne brust in sîne hende vie .
0,48 ouwî küniginne
0,49 waz genâden got an dir begie .
0,50 lâ mich geniezen swenne ich dich nenne
0,51 daz ich Maria vrouwe daz geloube und daz an dir erkenne
0,52 daz nieman guoter
0,53 mac des verlougen dû ne sîst der barmunge muoter .
0,54 lâ mich geniezen des dû ie begienge
0,55 in dirre werlt mit dînem sune sô dû in mit hande zuo dir vienge
0,56 sô wole dir des kindes
0,57 hilf mir umbe in ich weiz vrouwe wole daz dû in senften vindest .
0,58 dîner bete mac dir dîn lieber sun niemer verzîhen .
0,59 bit in des daz er mir wâre riuwe müeze verlîhen .
0,60 und daz er durch den grimmen tô
0,61 den er leit durch die mennischheit
0,62 sihe an mennischlîche nô .
0,63 und daz er durch die namen drîe
0,64 sîner kristenlîcher hantgetât
0,65 genædic in den sünden sî .
0,66 hilfe mir vrouwe dâ diu sêle von mir scheide
0,67 dâ kum uns ze trôste
0,68 wande ich geloube daz dû bist
0,69 muoter unde maget beidiu .